

东华方诸宫高晨师玉保王青童君道经第三十四

“ 东华方诸宫高晨师玉保王青童君道经第三十四

上清大洞真经卷之五


茅山上清三十八代宗师蒋宗瑛校勘

血中赤炁君章

谨请血中赤炁君混离子，字叔宝坚；司命精魂发纽子，字庆玄，共守兆百关之穴，绝节之下死炁之门，使五帝之液盈于六府，九灵之润充于血肉，绝节不空，地门填塞，七祖结散，更生南极，兆得玉仙，合道保德。

真思血中赤炁君混离子、司命精魂发纽子真炁，赤云之色，罩于顶上，乃默呪曰：

晨景焕东霞，丹景映高清，二真协神宗，落落七华生，五老飞帝席，太一保童婴，锦云曜幽夜，朗朗开重冥，七祖勒符籍，南极受胎灵，高晨盼云舆，运我升飞輶，拔解亿世基，同欢万劫程。



次思赤云从兆泥丸中入，兆乃口吸神云，咽津七过，结作七神，下入绛宫。六神状如力士，分左右各三，下布两脚绝骨之户；一神状如赤帝，下入尾闾穴，上穿泥丸，充入发际之户，顺时吐息。

诵玉经。

大洞玉经曰

东华青宫发始晖，高晨青童君映上清，焕洞圆珠蔚日名，朗朗紫曜明，七神回帝席，五老飞玉輶，太一景中立，司命摄万精，汎然云波间，寂盼泥丸城，七转召三官，北君冥官启首灵，五岳应炁到，拔死书长生，三举震丈符，玄解大魔精，七祖散血结，玄华保黄宁。

高上消魔玉清王祝曰

五道混回，七门白帝门始分，南和赤帝建节，白帝彰安，灵标肺神理魄，会昌护神，奉符登霄，寢息玉轩，定录琼礼，世为天仙，三涂塞绝，除伐胞根，死炁沉零，祸轮无连，福臻重枝，庆会华玄，名书玉堂内，世为道德门。



毕，乃口微祝曰：

天上内音，观轩寝，明宾郁。

地上外音，三生连，虚无中。

大洞血中赤炁君消魔玉符

诀曰：当朱书黄缙，佩之，存呼赤炁君内讳名字，镇我百关之穴，使灵液盈充，玉泽流溢，死炁断绝，神固孔节，七祖各散，宿根咸灭。乃叩齿三通，次咽液三过。



🕒版本号 #1

★由 上清持伟 创建于 11 一月 2023 03:20:54

✎由 上清持伟 更新于 11 一月 2023 03:22:24